

BREU APOSTOLIC DEL SANT PARE

BENET XV

A

FOMENT DE PIETAT CATALANA



**C**XTAT Barcinone, jam inde ab anno MDCCCCXIII pium opus vulgo appellatum FOMENT DE PIETAT CATALANA, frugiferum ad finem erectum fovendae pietatis inter homines cujusque conditionis tum verbo, tum praelo impressis scriptis. Plures Sacerdotes, communem vitam agentes, operi adlaborant, et tum religiosos libros in vulgus effundere, tum Sacras Missiones agere, tum spirituales exercitationes habere student. Nunc autem cum hodiernus pii Instituti Moderator enixas Nobis preces adhibuerit ut Rectoribus, Collaboratoribus, Patronis ac Sociis Operis ejusdem, nonnullas indulgentias, ac privilegia largiri de Apostolica benignitate dignemur, Nos, inspectis etiam amplissimis suffragiis tam Episcopi Barcinonensium quam S. R. E. Cardinalis Archiepiscopi Tarraconensium, optatis his annuendum ultro libenterque existimavimus. Quare de Omnipotentis Dei misericordia ac BB. Petri et Pauli Apostolorum ejus auctoritate confisi, omnibus et singulis praesentibus et futuris Rectoribus, Collaboratoribus, Patronis et Sociis pii Operis appellati FOMENT DE PIETAT CATALANA, die quo primum in idem Opus cooptentur, si vere poenitentes et confessi Sanctissimum Eucharistiae Sacramentum sumpserint, *plenariam*; et quotannis die festo Virginis a Monteserrato, coelestis enunciati operis Patronae, si item admissorum confessione expiati ac coelestibus recreati epulis, propriam Operis Ecclesiam, si habeant, secus quamvis sacram Aedem, a medietate diei praecedentis ad mediam usque noctem ejusdem festi visitent, ibique pro Christianorum Principum concordia, haeresum extirpatione,

peccatorum conversione ac Sanctae Matris Ecclesiae exaltatione pias ad Deum preces effundant, quo die injuncta pietatis opera impleant, etiam *plenariam* omnium peccatorum suorum Indulgentiam et remissionem misericorditer in Domino concedimus. Insuper iisdem Moderatoribus, Collaboratoribus, Patronis et Sociis, quoties quamvis elemosynam in pii operis emolumentum conferant, de numero poenaliū in forma Ecclesiae solita *trecentos dies* expungimus. Sacerdotibus autem, qui ex officio enunciato pio Instituto adlaborant, facultatem concedimus benedicendi Cruces, Crucifixos, Sacra Numismata, Coronas precatorias et parvas D. N. J. C., Deiparae Virginis et Sanctorum ex metallo statuas, eisque applicandi indulgentias, quae continentur in elenco edito die V mensis Septembris anno MDCCLXXIV, non exclusis, quod ad coronas precatorias, indulgentiis quae a Sancta Birgitta appellantur, itemque illis Cruciferorum Patrum; simulque veniam facimus benedicendi atque imponendi consuetis ritu ac formula, quatuor scapularia S. Cordis Jesu, B. M. Virginis a Monte Carmelo, Immaculatae Conceptionis, et Septem Dolorum B. M. Virginis. Sacerdotibus vero in domibus Instituti vitam communem agentibus largimur, ut pro interiori respectivae domus Sacello, altaris personalis privilegio, quater in hebdomada gaudeant. Denique Sacras Missiones, quas Institutum instruit ac fovet, peculiaribus gratiis ac privilegiis augere et decorare volentes, Apostolica Nostra auctoritate, praesentium vi, decernimus, ut Missionarii in dictis Sacris expeditionibus operam navantes, facultate polleant benedicendi etiam publice Cruces, Crucifixos, Sacra Numismata, Coronas precatorias et parvas statuas, eisque applicandi indulgentias omnes, quas supra numeravimus: pariterque queant quatuor dicta scapularia benedicere atque imponere, etiam adhibita formula generali, et cum dispensatione adscribendi nomina alicui confraternitati. Ad haec Missionariis dictis veniam largimur impertiendi in fine concionum benedictionem Apostolicam cum Crucifixo et sub Crucis unico signo, cum *plenaria* addita indulgentia ab iis fidelibus lucranda, qui saltem quinque e dictis concionibus audierint. Tandem fidelibus omnibus ad communionem generales ab ipsis Missionariis, intra respectivam Missionem instructas, confluentibus, *plenariam* omnium peccatorum suorum indulgentiam et

remissionem misericorditer in Domino tribuimus. Porro largimur Rectoribus, Collaboratoribus, Patronis, Sociis et fidelibus supradictis liceat plenariis hisce ac partialibus indulgentiis functorum vita labes poenasque expiare, si malint. Contrariis non obstantibus constitutionibus et ordinationibus Apostolicis, ceterisque omnibus in contrarium facientibus quibuscumque. Praesentibus perpetuo valituris. Volumus autem, ut praesentium Litterarum transumptis, seu exemplis, etiam impressis, manu alicujus Notarii publici subscriptis, ac sigillo personae in ecclesiastica dignitate constitutae munitis, eadem prorsus fides adhibeatur quae adhiberentur ipsis praesentibus si forent exhibitae vel ostensae. Datum Romae, apud Sanctum Petrum, sub anulo Piscatoris, die VI m. Augusti, anno MCMXXI Pontificatus Nostri septimo.

P. CARD. GASPARRI

*a Secretis Status.*